

## **YAMESI**

### **Pepa Yamesi ingere panzi**

### **kalo-tawana tamâta**

*Yamesi nde Yesu tai (Matai 13:55, Galesia 1:19), aku imo poe tamâta panzi kalo-tawana tamâta simo Jerusalem lawea (Pâri Tamâta 12:17, 21:17-18). Ingere ngua njine ilâ panzi Juda tamâta njinde kalonzi tawana Yesu Kirisi njinnga sikai nâna njana, kala sikâwa pwapwataki silâ kala simo piti piti lâ tâno pinde. Yamesi itula ngua arara njana vetânga pinde kinda kalo-tawana tamâta ma tapaveta kuku. Iporo tu ambo nenda kalo-tawana njandai igagati kinda njana taveta vetânga ara pinde nga, ande nenda kalo-tawana nde mao tia. Kinda ma tapakatona kawânda ngua sondo ndo, ku ma tapatawa tininda ku takai noŋa pa Maro Njalae.*

<sup>1</sup> Naŋa Yamesi, naŋa amo Maro Kindeni kuku Yesu Kirisi rua nenzi wurâta tamâta. Naŋa angere ngua lâ pepa njine tini imâ pa miki kalo-tawana tamâta lâ Isrel ngu saŋao kananomi rua, miki njinde kala muŋga kapile nemi lawea tina, aku kalâ kamo pwapwataki lâ tâno pinde. Naŋa aporo kari ara pa miki rârâni.

*Malia kie-kie uru isuka kinda njana tamandi kaika kê*

<sup>2</sup> Ninggu-nambwe wukale, ambo malia kie-kie ma ipânnga pa miki njana ikai samânga pami, ande ara njana miki ma kaporo ngua lâ warakami

ilomi mine tu, “Naŋa ma andeka pâta.” <sup>3</sup> Miki kasama tu ambo vetâŋa tonŋe ma ipânŋa ŋana ikai samâŋa pa nemi kalo-tawana kâ, ande vetâŋani ndaina isukami ŋana kamandi kaika ku kakale malia ndia rârâni. <sup>4</sup> Aku ara ŋana miki ma kamandi kaika mine nâ ku kakale nemi malia ikura zo rârâni. Ambo nemi kalo-tawana ma ikeno kaika mine ku imo nâ, ande miki ma kamo kalo-tawana tamâta sondo ndo, ikura Maro Kindeni ne pateâŋa mine, aku miki ma kakura ndo ŋana kaponu muli papa i.

*Ambo tamâta tonŋe iroto ŋana ilo-kalo ara kâ, ande ara ŋana i ma ikai noŋa pa Maro Kindeni nâ*

<sup>5</sup> Ambo tamâta tonŋe lâ miki ŋginimi iroto ŋana ilo-kalo ara kâ, ande ara ŋana i ma ikai noŋa pa Maro Kindeni tu ma ilo-kalo ilua i. Ambo tamâta ŋinde iveta mine, ande Maro Kindeni ma ipaloŋo pa i ne noŋa. Ŋana tu Maro Kindeni uru kelekele arara kie-kie ilanzi tamâta rârâni, aku i ŋandai tini pwâka ŋananzi ku imbitanzi ŋana nenzi noŋa ŋa. <sup>6</sup> Taitu ara ŋana tamâta ŋinde ma kalo tawana kaika muŋga lâ ŋga, ŋineŋga ikai noŋa pa Maro Kindeni. Ambo tu i ilo rua-rua kala iporo pa tamwata mine tu, “Tiambo Maro Kindeni ma ipaloŋo pa nanenŋu noŋa ku ilo-kalo ara ilua naŋa, tiya?”, ande ŋgua kaŋa mine nde ara tia. Tamâta ea ilo rua-rua mine, ande i itogo tâi ne kâla ŋinde lawea ikai kâki ku imbwa potomule mine. <sup>7</sup> Ambo tamâta mine itu Maro Ŋalae ma sâ tonŋe ilua i, ande i ne ilo-kalo ŋinde nde soki ndo, <sup>8</sup> ŋana tu i nde tamâta ŋana ilo rua-rua kâ. Mine kala i ne vetâŋa rârâni ikeno sondo tia ndo.

*Yamesi itula ngua panzi sugorai tamwatanzi wa kinzi mbaliya warakanzi wa*

<sup>9</sup> Ambo kalo-tawana tamâta tonje imo sugorai, i ne kelekele rârâ tia, ande ara nana i ma indeka nâ, nana tu Maro Kindeni isuka i kâki. <sup>10</sup> Ambo kalo-tawana tamâta tonje imo itogo mbaliya warika mine, ande ara nana i ma indeka lâ zo ndia i ipângga sugorai tamâta, nana tu tamâta ea kinzi ilonzi njalae koja tu sigona tâno ne mbaliya rârâ, ande kinzi njinde nenzi via ma muli marumbu lâ, itogo unza ne mâle mine. <sup>11</sup> Kinda tasama tu lâ zo nana kari ikâki kâ, ande kari uru iveta nia nâna ndo, aku ikana unza ngâla-ngâla ndo lâ. Njineŋga unza ne mâle siyauru sindue, aku ne siŋgâra ara marumbu ndo. Aku mine nâ, kinzi mbaliya warakanzi ma siveta nenzi wurâta lee, njineŋga walele nâ nenzi via ma marumbu lâ.

*Maro Kindeni ilaŋe kinda nana taveta kiesaka kâ, ande tia ndo*

<sup>12</sup> Tamâta ea uru imandi kaika ku ikale malia ikura zo rârâni, ande i ikura tu indeka. Ambo i ma ipole samâŋa njinde rârâni, aku ne kalo-tawana imbe tia, ande Maro Kindeni ma via mao ilua i itogo ne kulu mine, aku ma imo ara mine ku imo nâ. Muŋgani Maro Kindeni ipa ngua tu ma via mao ilanzi tamâta rârâni njinde ilonzi ndo keno pa i.

<sup>13</sup> Ambo kelekele tonje ma igagati tamâta tonje ilo ku ilaŋe i nana iveta kiesaka kâ, ande i ma iporo mine tu, “Maro Kindeni ilaŋe nana kala aveta kiesaka”, mine ndimo. Nana tu kiesaka tonje ikura tu ilaŋe Maro Kindeni tia

ndo, aku Maro Kindeni ilanzenzi tamâta nana siveta kiesaka kâ, ande tia ndo kanaŋo. <sup>14</sup> Taitu kinda tamâta warakânda taitu-taitu ilonda uru igagati kinda ku ilaŋe kinda nana taveta kiesaka kâ. Ilo-kalo sakamao uru iveta mona-mona pa kinda, aku ninde iveta ilonda kâki nana taveta kiesaka kâ. <sup>15</sup> Ninenga ilo-kalo sakamao ninde ipulia kiesaka ipânga lâ ilonda kalonda, itogo taine ipagugua natu mine. Aku muli nga kiesaka ma itumbu nala, ande ma ipagugua matenja lâ ilonda kalonda.

<sup>16</sup> Ningunambwe wukale, nana ilongu ndo keno pami. Miki ma ilomi kalomi soki-soki ku kapalâŋe warakami ndimo. <sup>17</sup> Kelekele ara ndia kinda takai, ande Tamânda imo samba ilo io kelekele ninde ndoni indue imâ pa kinda. Inani muŋga ipulianzi samba ne sinâla ndoni, aku i ma ilele tamwata ne vetâŋa, ande tia. Kari uru ikâki ipane nia lee indue, ninenga nia nana lâ; andeta Maro Kindeni ipalele mine tia ndo. <sup>18</sup> Nanayoni i ilo pateo tu ne ngua mao ma ipulia via ipânga lâ ilonda. I ilo tu kinda ma tamuŋga panzi tamâta ngu rârâni wa kelekele ndia rârâni i muŋga ipulianzi sipânga ninde, tatogo kâpwa wasaseki ipânga muŋgâŋa lâ tâno ilo mwasina.

*Ambo kinda taŋânda nâ taloŋo Maro Kindeni kawa ngua, ande ninde nde ara tia*

<sup>19</sup> Ningunambwe wukale, nana ilongu ndo keno pami. Miki kalomi ngere sondu nana nina kâ; ara nana miki rârâni taitu-taitu ma katambira taŋami walele nâ nana kaloŋo Maro Kindeni kawa ngua. Taitu miki ma kaporo

katula ŋgua walele ndimo, aku ma wisimi nâna walele ndimo. <sup>20</sup> Nana tu Maro Kindeni ilo tu kinda ma taveta vetâŋa ara lâ i nao, andeta kinda tamâta nenda wisi-nâna ŋandai isuka kinda ŋana taveta mine ŋga. <sup>21</sup> Mine nde ara ŋana miki ma kapile vetâŋa ndia uru iveta ilomi muso, aku kapile vetâŋa sakamao rârâni ŋinde kala ipâŋga ŋalae lâ tâno kulu. Ara ŋana miki ma kapatawa warakami tinimi ku kapono muli sondo pa Maro Kindeni kawa ŋgua, ŋgua ŋinde i uru io lâ ilomi kalomi. Nana tu ŋgua ŋinde ikura tu iyautemi piti lâ kondoma ilo ku via mao ilami.

<sup>22</sup> Miki ma kaloŋo Maro Kindeni kawa ŋgua ŋinde lâ taŋami nâ ndimo. Ambo miki ma kaloŋo kaa nâ, ande miki ma kapalâŋe warakami. Ara ŋana miki ma kapaveta kuku ŋgua ŋinde ku koka muli. <sup>23</sup> Ambo tamâta tonje iloŋo Maro Kindeni kawa ŋgua, andeta iloŋo kaa nâ kala ipaveta kuku tia, ande tamâta ŋinde itogo tamâta imora tamwata nao lâ ndunŋu ilo.

<sup>24</sup> I imora tamwata nao lâ, ŋinenŋa iyoka ilâ, aku walele nâ i kalo kapa tu i nao kilala mana.

<sup>25</sup> Taitu Yesu Kirisi ne ŋgua tukuŋa sondo ŋinde imbware kiesaka ne kaika ku iveta kinda tamo soo nâ. Mine kala tamâta ea uru kalo ŋgere sondo ŋana Maro Kindeni kawa ŋgua ku ipaveta kuku, ambo i ma kalo kapa ŋana tia, ande Maro Kindeni ne nzâmbe ma ikeno pa tamâta ŋinde ne wurâta tava ne vetâŋa rârâni.

<sup>26</sup> Ambo tamâta tonje ilo mine tu, “Nana nde kalo-tawana tamâta ara”, andeta i ŋandai ikatona tamwata kawa ŋgua sondo ŋga, ande

tamâta ñinde ikai lanjeña pa tamwata, aku ne kalo-tawana nde kekekele kaa nâ. <sup>27</sup> Ambo tamâta tonje ne kalo-tawana ikeno sondo ndo lâ Maro Kindeni nao, ne soki tonje tia, ande tamâta ñinde ma uru iveta mine; i ma ilo ñananzi lâlu mundoro wa kinzi taine mwala-mwala wa, ku ma isukanzi ñana nenzi malia kie-kie kâ. Andeta ñinde nâ tia; i ma ipakatona tamwata sondo tona, ñana tâno ñine ne vetâña potomule ma ikura tu iveta i ilo muso lâ Maro Kindeni nao, ande ma tia.

## 2

*Ara ñana kindi ma taveta vetâña kie taitu nâ panzi tamâta rârâni*

<sup>1</sup> Ninggu-nambwe wukale, Maro Kindeni kilala ipânga nia yo lâ nenda Maro Yesu Kirisi tini, aku nemi kalo-tawana ikeno pa i. Mine nde miki ma kaveta kemi ara panzi mbaliña warakanzi, anga kapu mulimi panzi sugorai tamwatanzi, mine ndimo. <sup>2</sup> Ambo tamâta rua ma soka lombo simâ nemi luma ñana pasauña kâ ilo ñana sipanea Maro Kindeni kâ, aku tamâta tonje lâ kinzi rua ipasawa pasawaña ara ndo ku io singâra “gol” lâ mbau sili, anga tamâta tonje nde imo sugorai, ne pasawaña ara tia; <sup>3</sup> ambo miki ma kaveta kie ara papa tamâta ñinde, i ne pasawaña ara, aku kano tu, “Noko kumâ kusanona sanonâña nia ara ñine”, andeta miki ma kaveta manjeti pa sugorai tamâta ñinde ku kapai tu, “Noko kulâ kumandi lâ nia ñgane ndai”, tâku, “Kusanona tâno kulu lâ naña kenju tini laiti”; <sup>4</sup> ambo miki ma kaveta vetâña kie mine, ande ñinde itogo miki

kapateanzi tamâta simo piti-piti ikura warakami nâ nemi ilo-kalo soki-soki. Aku ñinde itogo miki kapânga katogonzi ñgua-samâna tamâta ñinde simo tava ilo-kalo sakamao nâ.

<sup>5</sup> Niñgu-nambwe wukale, naña ilongu ndo keno pami. Miki kalonjo nga; Maro Kindeni ilo panzi tamâta ea simo sugorai lâ tâno tamâta naonzi, aku nanayoni ipatea tu nenzi kalotawana ma ipânga ñalae ndo. Aku ipatea tu ma ikai maro panzi tona, kala ma simo i ne ñgu. Muñgani i ipa ñgua tu ma ikai maro mine nâ panzi tamâta ea ilonzi ndo keno pa i. <sup>6</sup> Anğa miki uru kaveta mañeti panzi sugorai tamwatanzi. Opopo, kalomi ñgere sondo nga; ea kinzi uru sitawa miki ndue ku sio malia kâki lâ kulumi, a? Aku ea kinzi uru sikaimi kalâ pa ñgua nia, a? Kinzi mbaliña warakanzi nâ siveta kenzi mine pami! <sup>7</sup> Yesu Kirisi ña ikeno miki tinimi, andeta kinzi mbaliña warakanzi nâ uru siporo ñgua pavaliginja pa Yesu ne ñoa ara ñinde.

<sup>8</sup> Kinda nenda koipu ñalae Maro Kindeni ne tukunja ikeno lâ pepa tini mine tu, “Noko ma tini mwasa panzi tini pinde itogo noko tini mwasa pa tamwata mine”. Ambo miki ma kapaveta kuku ñgua tukunja ñinde, ande ñinde ma ara ndo. <sup>9</sup> Taitu miki kalonjo nga; ambo miki ma kaveta kemi ara panzi mbaliña warakanzi, andeta ma kapu mulimi panzi sugorai tamwatanzi, ande miki kaveta kiesaka, aku ñgua tukunja itula kilalami pwataki tu miki nde tamâta ñana kapu ñgua tukunja ututu. <sup>10</sup> Ambo tamâta tonje uru ipono muli pa ñgua tukunja rârâni, andeta ipu ñgua tukunja taitu nâ utu, ande ñinde itogo

ilaja ipole ngua tukuja rârâni. <sup>11</sup> Kinda tasama tu Maro Kindeni itula tukuja tonje pwataki mine tu, “Noko ma kuveta sakamao kuku tamâta tonje kaiwa ndimo”. Aku ina kala itula tukuja tonje pwataki mine tu, “Noko ma kupu tamâta pâta imâte ndimo”. Mine kala, ambo noko kupono muli pa ngua tukuja nana pakâenja kâ, andeta kupu tamâta tonje pâta imâte, ande noko kupânja tamâta nana kulanja kupole ngua tukuja kâ.

<sup>12</sup> Miki kalomi ngere sonde nana njine kâ; Yesu Kirisi ne ngua tukuja nana tini-mwasa kâ imbware kiesaka ne kaika ku iveta kinda tamo soo nâ, aku Maro Kindeni ma ilea pa tukuja ndainani nâ lâ zo njinde kinda ma tamandi lâ i ne ngua nia. Mine nde ara nana miki ma kaporo wa kaveta ikura tukuja njinde kilala mine. <sup>13</sup> Nana tu lâ zo nana Maro Kindeni ma ipare nia panzi tamâta kâ, tamâta ea munja nandai kalo sukâja nanzizi i tini pinde, ande Maro Kindeni ma kalo sukâja nana tamâta njinde, ande tia. Mâsi nana kalo-sukâja kâ nde njalae ndo, ipole pareja-nia ne mâsi.

*Nenda vetâja itula nenda kalo-tawana kilala pwataki*

<sup>14</sup> Ninggu-nambwe wukale, ambo tamâta tonje iporo tu, “Nanja kalongu tawana Yesu Kirisi”, andeta i nandai iveta vetâja ara pinde nga, ande tamâta njinde ne kalo-tawana nde kelekele kaa nâ. Tiambo kalo-tawana kie mine ikura nana iyaute tamâta njinde piti lâ kondoma ilo

ku via mao ilua i, tiya? Tia ndo! <sup>15</sup> Ambo kalo-tawana tamâta tonje i ne lalava ara tonje tia, aku i kâ kaniņa kala keno tia, <sup>16</sup> ambo tamâta tonje lâ miki ŋginimi ipai tu, “Maro imo kuno! Noko kulâ, aku kupita lalava ara lâ tini wa kuka kaniņa ŋana ma kapwa pupuro kâ”; ambo tamâta ŋinde ma iporo ŋgua kaņa mine, andeta i tamwata tini pwâka ŋana isuka sugorai tamâta ŋinde ŋana lalava wa kâpwa wa, ande i ne ŋgua ma isuka tamâta ŋinde mâsi mana, a? Tia ndo! <sup>17</sup> Aku nenda kalo-tawana kilala kala ikeno mine nâ. Ambo tamâta tonje ne kalo-tawana ŋandai igagati i ŋana iveta vetâņa ara pinde kâ, ande ŋinde itogo i ne kalo-tawana nde imâte lâ.

<sup>18</sup> Tamâta pinde uru siporo pa nawalanzi tu, “Noko kalo tawana Maro Kindeni, aŋga naņa uru aveta vetâņa ara pinde”. Taitu naņa ilonju tu atu ŋgua lâ kawanzi mine tu, “Ambo noko kalo tawana Maro Kindeni, andeta noko ŋandai uru kuveta vetâņa ara pinde, ande naņa ma akura tu asama noko ne kalo-tawana ŋinde kilala pwataki mâsi mana, a? Ambo taitu naņa warakâŋgu ma aveta vetâņa ara pinde, aku ŋine ma itula pwataki pa noko tu nanenju kalo tawana nde mao nâ. <sup>19</sup> Noko uru kutula ne kalo-tawana pwataki mine tu, ‘Maro Kindeni simbo nâ nde Maro mao’, aku ŋgua ŋinde nde ara ndo. Andeta kulonjo ŋga; kinzi koroani saka kala uru kalonzi tawana mine nâ, aku ŋine iveta kinzi siruru pâta kanaņo!

<sup>20</sup> Noko kulu kâmba tia ndo! Ambo noko ne kalo-tawana ŋandai igagatino ŋana kuveta vetâņa ara pinde kâ, ande noko ne kalo-tawana

nde kelekele kaa nâ.” Kala ñine naña ma atula ñgua ñine ne duvi pwataki. <sup>21</sup> Munğa, kinda timbunda Abraham io i natu Isaka kâki mira kulu ñana ipu pâta imâte ku ilua Maro Kindeni itogo patarawâña mine. Lâ zo ñinde, Maro Kindeni ilo ara ndo ñana Abraham ne kalo-tawana kâ, aku imora Abraham tu i tamâta ñana ilo mbâra-mbâra kâ. <sup>22</sup> Miki kalomi ñgere sondo ñga. Abraham ne kalo-tawana nde ilâ taitu kuku i ne vetâña, aku i ne vetâña nde iveta ne kalo-tawana ipânga mao. <sup>23</sup> Mine kala Maro Kindeni kawa ñgua ipânga kanaño. I ne ñgua ikeno lâ pepa tini mine tu,

“ ‘Abraham io ne kalo-tawana ilâ pa Maro Kindeni, aku ñana duvi ñinde kâ ipânga ilo mbâra-mbâra lâ Maro Kindeni nao.”

Aku muli ñga Maro Kindeni iporo ñgua ñana Abraham mine tu, “Abraham nde imo naña ningunambwe.” <sup>24</sup> Kala ñine ñga miki kasama tu kalo-tawana lanęa ikura ñana iveta tamâta tonęe ipânga ilo mbâra-mbâra lâ Maro Kindeni nao, ande tia. Kalo-tawana mao uru ipulia vetâña ara pinde, aku kalo-tawana kie mine nâ ikura ñana iveta tamâta ipânga ilo mbâra-mbâra lâ Maro Kindeni nao.

<sup>25</sup> Munğa, nzâla taine tonęe imo, i ña mine Rahap. Kinda timbunda Yosua ionzi zugu tamâta rua soka paveâña nâ silâ pa Rahap ne lawea, ñana sisama kazâña tamâta ñinde nenzi kaika, aku Rahap iveta kie ara panzi. Iveanzi lâ ne luma ilo lee, ñineņa ionzi soka ara lâ nzâla tonęe sinęeņa ñana kazâña kâ ku sitaulo kilo. Maro Kindeni imora Rahap ne vetâña ara ñinde,

ande kala iveta i ipângga ilo mbâra-mbâra lâ i nao. <sup>26</sup> Kinda tasama tu ambo koroani ipile tamâta tonje karae, ande tamâta ñinde nde imâte lâ. Aku mine nâ, ambo tamâta tonje ne kalo-tawana ñandai igagati i ñana iveta vetâña ara pinde, ande ñinde itogo i ne kalo-tawana nde imâte lâ.

### 3

*Kinda ma tapakatona sondo ñana kawânda ñgua kê*

<sup>1</sup> Niñgu-nambwe wukale, ambo tamâta rârâ lâ miki ñginimi situ sikai wurâta ñana sipanananzi tamâta ñana Maro Kindeni kawa ñgua kê, ande ñinde ara koña tia. Nanenju ñgua ñinde nde duvi mine; lâ zo ñana kinda tamâta rârâni ma tamandi lâ Maro Kindeni ne ñgua nia, ande i ma io mata ilea kaika pa maka pananâña tamâta nema vetâña. <sup>2</sup> Kinda rârâni taitu-taitu uru taveta vetâña potomule pinde. Andeta miki kalonjo ñga; ambo kalo-tawana tamâta tonje ma iporo ñgua ara nâ, ande tamâta mine ma imo tamâta sondo ndo, aku ma ikura ñana ipakatona tamwata tini ndoni sondo.

<sup>3</sup> Kinda uru tao “aini” mbuku pinde lâ hosi kawanzi ilo, ñana iveta kinzi silâ ikura ilonda papa mine. Ambo takatona kinzi hosi kawanzi mine, ande kinda takura tu takai poe pa tininzi ndoni. <sup>4</sup> Aku miki kalomi ñgere ñana wânga ñalanala nenzi vetâña kê tava. Wânga nde kekeleke ñalae tina, aku lawea uru iyoka more-more ñalae ku izuzuña wânga ikâwa tâi kulu ilâ. Anja wânga ne poe nde kekeleke kiri-mwata

nâ. Andeta kalomi ngere nana nîne kâ; ambo wânnga warika itambulilia poe kiri-mwata ninde, ande wânnga ma nao sori lâ, ku ma ilâ papa nia ndia wânnga warika itu ilâ papa. <sup>5</sup> Aku mine nâ, kinda kawânda nde karaenda ne pinde-pinde kiri-mwata nâ. Taitu i uru ipasuka tamwata tini kâki ndo. Aku kalomi ngere nana yââ tona. Yââ tini-mwata nâ ikura tu igagati yââ njalae tina ku ikananzi kâi rârâni lâ dugu ilo. <sup>6</sup> Aku kinda kawânda kala itogo yââ mwasina. I nde karaenda ne pinde-pinde taitu nâ, ambo taitu i uru ipulia vetânja sakamao kie-kie rârâ. I uru iveta karaenda ndoni ipânnga muso, aku iveta nenda vetânja ndoni ipânnga soki-soki, itogo yââ ikana kelekele ndoni mine. Aku yââ ninde nde iyoka pa yââ njalae ne mbââ ilo kala imâ kawânda ilo.

<sup>7</sup> Kinda tamâta takura nana takai poe panzi simbi ngoi kie-kie, kinzi sii wa mwâta wa kelekele rârâni uru simo tâi ilo wa. Mao nâ, kinda taveta kinzi simbi ngoi rârâni simo kalonda marumbu lâ. <sup>8</sup> Taitu tamâta tonje ikura nana ikai poe sondo pa tamwata kawa, ande tia ndo. Ikura zo rârâni, kinda kawânda pakâe ku taporo ngua sakamao. Kinda kawânda nde itogo mwâta saka mwasina, aku ninde itogo kawânda ikura nana ipu tamâta pâta imâte.

<sup>9</sup> Kinda kawânda taporo ngua pinde nana tapanea nenda Maro Njalae kâ, ina kinda Tamânda. Andeta taporo ngua sakamao pinde nana tayaulanzi tamâta kâ tona, kinzi ninde Maro Kindeni muŋga io tamwata kilala lâ tin-inzi. <sup>10</sup> Kinda kawânda nde kelekele taitu nâ,

andeta ŋgua kaŋa rua uru ipâŋga lâ kawânda ilo. Paneâŋa ne ŋgua uru ipagema kuku ŋgua sakamao. Niŋgu-nambwe wukale, vetâŋa mine nde ara tia ndo. <sup>11</sup> Lââ ara ne keve tonje ikura tu ipulia tâi tava, ande tia. <sup>12</sup> Niŋgu-nambwe wukale, kâi mbimu ikura ŋana ipulia nâto kanaŋo, ande tia, aŋga kâi wâwâe ikura ŋana ipulia mbimu kanaŋo, ande tia. Aku mine nâ, tâi ikura ŋana ipulia lââ ara kâ, ande tia. Mine nde mana mana ŋga kinda kawânda uru iporo ŋgua kaŋa rua, a?

*Ambo tamâta tonje ne ilo-kalo nde sondo, ande i ma iveta vetâŋa ara*

<sup>13</sup> Ambo tamâta tonje imo miki ŋginimi tava ilo-kalo sondo, ande i ne vetâŋa rârâni ma itula ne ilo-kalo ŋinde pwataki. I ma ipatawa tamwata tini ku ma ipono muli pa vetâŋa ara, itogo i ne ilo-kalo sondo kilala mine. <sup>14</sup> Aŋga tamâta ea uru ipadâda ŋananzi tamâta pinde, aku imo iroto nzâla ŋana ipasuka tamwata tini kâ, ande tamâta mine ma indeka ku iporo tu, “Nanenġu ilo-kalo nde ara nâ”, mine ndimo. Ŋgua kaŋa mine nde ŋgua laŋeŋa nâ. <sup>15</sup> Ilo-kalo kie mine ŋandai iyoka pa samba indue imâ ŋga. Ŋinde nde tâno nâ ne ilo-kalo, aku ŋinde nde ilo-kalo potomule lâ Maro Kindeni nao. Sadana nde imo ilo-kalo kie mine warika. <sup>16</sup> Miki kalonjo ŋga; tamâta ea kinzi uru sipadâda ŋananzi tamâta pinde, aku simo siroto nzâla ŋana sipasuka warakanzi tininzi kâ, ande tamâta ŋinde silaŋa sipole ŋgua tukuŋa, aku uru siveta vetâŋa potomule kie-kie rârâni tona.

<sup>17</sup> Anḡa ilo-kalo ara iyoka pa samba indue imâ, aku ilo-kalo ḡinde nde kie tonḡe. Tamâta ea kinzi sikai ilo-kalo ḡinde, kinzi ḡinde ma siveta vetâḡa sondo lâ Maro Kindeni nao. Kinzi ma simo ilonzi kalonzi taitu kunzi tininzi pinde, ku ma naonzi mwasa nâ panzi. Kinzi ma sipatawa warakanzi tininzi, ku ma kalonzi sukâḡa ndo ḡananzi tininzi pinde. Kinzi ma siveta vetâḡa ara kie-kie, ku ma siveta vetâḡa kie taituni panzi mbaliḡa warakanzi wa kinzi sugorai tamwatanzi wa. Kinzi nenzi vetâḡa ma irerege kuku kawanzi ḡgua. <sup>18</sup> Ambo wisi-pisi ne mâsi ma imo ḡḡininda, ande ḡinde itogo kinda tapau kaniḡa vâsa lâ tâno ilo. Aku muli, ḡineḡa vetâḡa arara kie-kie ma ipâḡa lâ ḡḡininda, itogo kâpwa ara ipâḡa tâno ilo mine.

## 4

*Tamâta ea ipono muli pa tâno ne vetâḡa, ande i imo Maro Kindeni ne kazâḡa tamâta*

<sup>1</sup> Pambitâḡa tava pawaḡa râra uru ipâḡa lâ miki ḡḡinimi. Aku ḡinde nde duvi mana, a? ḡinde miki kasama lâ. Miki uru ilomi kâki ḡana kagona mbaliḡa kie-kie, aku ḡinde iveta paraḡa ipâḡa lâ ilomi kalomi.

<sup>2</sup> Miki ilomi ḡalae koḡa tu kagona mbaliḡa kie-kie, andeta miki ḡandai kakai ḡa. Mine kala miki uru kapunzi tamâta pâta simâte. Miki ilomi yosi pa mbaliḡa, taitu miki kakai, ande tia. Mine kala miki uru kapawa sakamao ndo wa kaveta paraḡa wa. Miki ḡandai kano pa Maro Kindeni tu ma mbaliḡa ilami ḡa, aku

ņana duvi ņinde kâ, ande miki kakai mbaliņa ņinde tia. <sup>3</sup> Aku lâ zo ņana miki kakai noņa pa Maro Kindeni tu i ma mbaliņa ilami, ande miki kakai tia, ņana tu nemi ilo-kalo nde soki-soki. Miki ilomi tu kakai mbaliņa ņana kandeka ku katambira kaa nâ, aku kalomi kapa ņana Maro Kindeni kâ.

<sup>4</sup> Miki nde katogo taine tonģe ipile kaiwa tamâne ku ilâ itambira tini potomule! Miki kalonģo ņga; ambo tamâta tonģe ilo pa tâno ņine ne vetâņa wa kelekele wa, ande ikai kazâņa pa Maro Kindeni. Tiambo miki kazizâla ņana ņinde kâ, a? Tamâta ea ilo tu iveta mete kuku tâno ņine ne vetâņa, ande i imo Maro Kindeni ne kazâņa tamâta. <sup>5</sup> Maro Kindeni kawa ņgua ikeno lâ pepa tini, aku ņgua ņinde itula pwataki tu i io Koroani Sapâņa imâ ilonda lâ, aku Maro Kindeni ilo ņalae tu kinda ma tao ilonda ndo ilâ papa i simbo nâ. Tiambo miki katu ņgua ņine nde ņgua kaa nâ, a? <sup>6</sup> Taitu Maro Kindeni ne wisi-wisi nde imâ ņalae ndo pa kinda. Mine kala i kawa ņgua ikeno lâ pepa tini mine tu,

“Tamâta ea kinzi uru sipasuka warakanzi nâ tininzi, ande Maro Kindeni ikai kazâņa panzi; aņģa i ne wisi-wisi ikeno panzi tamâta ea uru sipatawa warakanzi tininzi.”

<sup>7</sup> Mine nde ara ņana miki ma kapatawa warakami tinimi lâ Maro Kindeni nao, aku kapaveta kuku i kawa ņgua. Ambo miki ma kakai kazâņa pa Sadana, ande i ma ipilemi ku ikâwa ilâ. <sup>8</sup> Ambo miki ma kalâ kamo Maro Kindeni tini laiti, ande i kala ma imâ imo ku miki mine nâ. Miki kiesaka tamwatami, ara ņana miki

ma kapaveta kuku vetâṅa ara nâ, itogo tamâta ipua mbau ṅana ipâṅga tini mbâra-mbâra kâ. Aku miki tamâta ea kamo tava ilomi kalomi rua-rua nâ, ande ara ṅana miki ma kasoki ilo-kalo sakamao ikeno ilomi ṅinde piti, ṅana ilomi ma ipâṅga mbâra-mbâra kâ. <sup>9</sup> Ara ṅana miki ma kalomi ṅgere ṅana nemi vetâṅa soki kâ, aku kalomi sukâṅa wa ilomi malia wa kata ṅalae wa. Miki tamâta ea uru kandeka ṅana nemi vetâṅa soki kâ, ande ara ṅana miki ma kapalele ku kamo tava ilomi malia ndo. <sup>10</sup> Ambo miki ma kapatawa warakami tinimi lâ Maro ṅalae nao, ande i ma isuka miki kâki.

*Kinda ma tasowe ṅgua sakamao ilâ panzi kalo-tawana tamâta ndimo*

<sup>11</sup> Ningū-nambwe wukale, miki ma kaporo ṅgua sakamao ilâ panzi ninda-nambwe kalo-tawana tamâta ndimo. Tamâta ea isowe ṅgua sakamao ilâ pa ninambwe kalo-tawana tamâta wa italea i wa, ande ṅinde itogo tamâta ṅinde italea ku iporo ṅgua sakamao pa Maro Kindeni ne tukuṅa tona. Aku lâ zo ndia noko kutalea tukuṅa ṅinde, ande noko kupu muli papa marumbu lâ, aku kupamorai tu noko nde ṅalae kala kupole tukuṅa. <sup>12</sup> Taitu Maro Kindeni simbo nâ ipulia ṅgua tukuṅa, aku i simbo nâ ma ipare nia panzi tamâta. I simbo nâ ikura ṅana iyautenzi tamâta ku via mao ilanzi, aku i simbo nâ ikura ṅana izavarunzi kâ. Mine kala noko nde ea kala kutu kutalea ṅgua ilâ panzi noko tini pinde, a?

*Kinda ma tapasuka warakânda tininda ndimo*

<sup>13</sup> Miki tamâta pinde uru kaporo ŋgua mine; “Tiambo ŋainani tâku mbwale tâku, ande naŋa ma ayoka alâ pa lawea tonje, aku ma akai wurâta ŋana mbaliŋa kâ ikura mbwera taitu.” Ayo, noko tamâta ea uru kuporo ŋgua kaŋa mine, ande kuloŋo ŋga; <sup>14</sup> Noko ŋandai kusama ŋana vetâŋa ndia ma ipâŋga lâ mbwale kâ. Noko ne via nde itogo mundo ipâŋga ku imo zo tini nâ, ŋinenŋa walele nâ marumbu ndo, aku nao tia lâ. <sup>15</sup> Mine nde ara ŋana noko ma kuporo ŋgua kaŋa mine; “Ambo Maro Ŋalae ma isâu pa naŋa, ande naŋa ma amo viâŋgu, ku ma aveta wurâta ŋinde ilongu tu aveta.” <sup>16</sup> Andeta miki uru kapasuka warakami tinimi. Miki kapandekâna warakami, andeta kalomi kapa ndo ŋana Maro Kindeni kâ. Aku vetâŋa rârâni kie mine nde vetâŋa sakamao ndo. <sup>17</sup> Miki rârâni taitu-taitu kalomi ŋgere sondu ŋga; ambo Maro Kindeni itula vetâŋa ara tonje pa noko tu kuveta, andeta noko ŋandai kuveta vetâŋa ŋinde ŋga, ande ŋinde nde kiesaka.

## 5

### *Ŋgua kaika ilâ panzi mbaliŋa warakanzi*

<sup>1</sup> Kala ŋine naŋa atu aporo ŋgua pinde pa miki mbaliŋa warakami. Malia ŋalaŋala kie-kie nde nao laiti ŋana ipâŋga pami kâ. Mine nde ara ŋana miki ma kakai kalo-kalo ku kata ŋalae.

<sup>2</sup> Miki nemi mbaliŋa wa kekelele rârâni nde nao tia lâ, aku nzirika sika nemi lalava arara rârâni marumbu lâ. <sup>3</sup> Miki nemi “gol” wa “silva” wa, ande take kana lâ. Aku lâ zo ŋana Maro

Kindeni ma ipare nia panzi tamâta kâ, ande take kana ñinde ma itula nemi kiesaka ipânga nia yo, aku ma ikana miki karaemi itogo yââ mine. Zo imâ ipânga laiti lâ ñana tâno ñine ne zo ma marumbu kâ, taitu miki kamo kagona mbaliña nâ. <sup>4</sup> Miki kalomi ñgere sondo ñga; muña, tamâta pinde sikai wurâta pami lâ nemi tâno ilo, andeta miki kakai lañeña panzi ku katoto nenzi mbumbu pinde. Aku mbumbu ndainani nâ nde isarâwa pa Maro Kindeni tu ma ipare nia pami ñana nemi vetâña sakamao ñinde kâ. Aku nemi wurâta tamâta ñinde nenzi sarawâña kala ipânga pa Maro Ñalae, i Walo Tamwata, aku iloño lâ. <sup>5</sup> Ikura zo rârâni miki kamo tâno kulu, ande miki uru kakai mbaliña arara kie-kie, kala kamo kandeka nâ. Miki uru kaka kâpwa ñalae, kala katumbu ñalañala lâ. Mine nde miki katogo ñgoa itumbu ñalae, ñineña tamâta sipu pâta imâte. <sup>6</sup> Miki uru kaonzi tamâta arara lâ ñgua nia, ñineña kapunzi pâta simâte. Andeta kinzi ñandai miki nemi kazâña tamâta ñga.

*Ara ñana kindi ma tatu ilonda keno mwasa ñana takale malia kâ*

<sup>7</sup> Mine nde ñingu-nambwe wukale, ara ñana miki ma katu ilomi keno mwasa ñana kakale malia kâ, aku kao tinimi pa Maro Ñalae ne zo ñana itaulo imâ kilo kâ. Kalomi ñgere ñana ñine kâ: kindi uru tao tininda ñana kâpwa ara tu ipânga lâ tâno ilo, aku tatu ilonda keno mwasa ku tao tininda pa karâzi tu ma isuka tâno. <sup>8</sup> Aku ara ñana miki kala ma katu ilomi keno mwasa mine nâ ñana kakale malia kâ. Aku kamandi

kaika nâ, nana tu Maro Njalae ne zo nana itaulo imâ kilo kâ ande imâ ipânnga laiti lâ. <sup>9</sup> Ningu-nambwe wukale, miki ma wisimi nâna panzi ninda-nambwe kalo-tawana tamâta ku kaporo ngua nao-muli panzi, mine ndimo. Tia ma Maro Kindeni io miki lâ i ne ngua nia nana ipare nia pami. Miki kaloŋo nga; tini nâ nga Ngua-Samâna Tamwata ninde ma imâ ipânnga.

<sup>10</sup> Ningu-nambwe wukale, ara nana miki ma kalomi ngere nananzi ngua-tulâna tamâta muŋgâna, kinzi ninde muŋga situla Maro Njalae kawa ngua. Lâ zo ninde, nenzi kazâna tamâta uru siveta kenzi sakamao ndo panzi, andeta kinzi situ ilonzi keno mwasa aku sikale malia ninde. Ara nana miki kala ma kaveta ikura nenzi vetâna mine. <sup>11</sup> Kinda uru taporo ngua mine; “Tamâta ea kinzi situ ilonzi keno mwasa nana sikale malia kâ, ande kinzi ninde sikura nana sindeka kâ”. Aku miki kaloŋo Jop parina lâ tu i itu ilo keno mwasa ku ikale malia kie-kie ipânnga papa i ninde. Aku miki kasama tu muli, ande Maro Njalae iveta kie ara ndo pa Jop. Mao nâ, Maro Njalae kalo sukâna ndo pa kinda, aku i nao mwasa nâ pa kinda.

*Kinda ma tasarâwa pa sâ tonje nana isuka kinda nenda ngua pâna, mine ndimo*

<sup>12</sup> Ningu-nambwe wukale, nanenğu ngua njine nde njalae tina; miki ma kasarâwa pa samba wa tâno wa kelekele tonje nana isuka nemi ngua pâna, mine ndimo. Ambo miki kapambwâre nana kaveta vetâna tonje, ande ara, kaveta ikura warakami kawami mine. Ambo miki ma kaporo tu, “Nana ma aveta vetâna ninde tia”,

ande ara, kaveta ikura warakami kawami mine. Ambo miki ma kasarâwa pa sâ tonje tu isuka nemi ngua, ande Maro Kindeni ma iomi lâ i ne ngua nia.

*Maro Kindeni uru ipaloŋo pa tamâta ara nenzi noŋa*

<sup>13</sup> Ambo malia ipânja pa tamâta tonje lâ miki nginimi, ande ara ŋana tamâta ŋinde ma ikai noŋa pa Maro Kindeni ŋana isuka i kâ. Ambo tamâta tonje ilo ndeka, ande ara ŋana i ma iwânji wânjiŋa paneâŋa kâ pa Maro Kindeni.

<sup>14</sup> Ambo tamâta tonje lâ miki nginimi ikai pukonja, ande ara ŋana i ma ipasupwa ilâ panzi kalo-tawana tamâta ŋgu nenzi katonâŋa tu ma simâ kuku. Njineŋa kinzi ma sino pa Maro Njalae, ku ma sikai i ndamwa ku siyoli samimi lâ pukonja tamâta ŋinde tini. <sup>15</sup> Ambo nenzi kalo-tawana ikeno mao pa Maro Kindeni, kala sikai noŋa mine papa i, ande Maro Njalae ma izavaru pukonja ŋinde piti lâ tamâta ŋinde tini, aku ma tini ara kilo. Ambo tamâta ŋinde muŋga iveta kiesaka, ande Maro Njalae ma izavaru kiesaka ŋinde piti lâ i tini tona. <sup>16</sup> Mine nde ara ŋana miki kalo-tawana tamâta taitu-taitu ma kapatula nemi kiesaka pa nawalami, aku kano pa Maro Kindeni tu ma isukami. Ambo miki ma kaveta mine, ande Maro Kindeni ma ivetami tinimi ara kilo. Ambo tamâta tonje imo tamâta sondo lâ Maro Kindeni nao, aku ikai noŋa papa, ande Maro Kindeni ma ipaloŋo pa tamâta ŋinde ne noŋa. Kinzi tamâta mine nenzi noŋa ma sikai kanaŋo.

<sup>17</sup> Nguwa-tulâŋa tamâta muŋgâŋa Ilia, ande i tamâta nâ, itogo kinda mine. Andeta i ino kaika pa Maro Kindeni tu ma isae nzâla pa karâzi ŋana indue imâ tia kâ. Njineŋga karâzi imbe indue tâno kulu tia ndo lee, ikura mbwera ŋato aŋga nzimona lima kanaŋo taitu lâ. <sup>18</sup> Aku muli, njineŋga ikai noŋa kilo, aku karâzi imbe indue, kala kâpwa ipâŋga tâno ilo kilo.

*Ambo tamâta tonje iveta kiesaka, ande ara ŋana kinda ma takai i taulo pa nzâla ara kilo*

<sup>19</sup> Niŋgu-nambwe wukale, ambo tamâta tonje lâ miki ŋginimi ipu muli pa Maro Kindeni ne ŋgua mao ku ilâ iveta kiesaka, njineŋga i ninambwe tonje ikai i taulo imâ pa nzâla ara kilo, ande ninambwe ŋinde iveta kie ara ndo papa i. <sup>20</sup> Miki kalomi ŋgere sondo ŋana njine kâ; ambo tamâta tonje itu ipono muli pa kiesaka, andeta ninambwe tonje isuka i ŋana ipile nzâla sakamao ŋinde, kala itaulo imâ pa Maro Kindeni kilo, ande ŋinde itogo i ninambwe ŋinde ikai tamâta ŋinde piti lâ nzâla ŋinde ilâ pa matera kâ. Aku Maro Kindeni ma izavaru i ne kiesaka piti lâ i tini tona.

**MARO KINDENI KAWA NGUA**  
**The New Testament and Psalms in the Sio Language**  
**of Papua New Guinea**  
**Nupela Testamen long tokples Sio long Niugini**

Copyright © 1995 Wycliffe Bible Translators

Language: Sio

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-09

---

PDF generated using Haiola and XeLaTeX on 4 Mar 2023 from source files dated 22 Nov 2019

b3b81168-89df-5bc3-8b0c-cf72ef93d3de